

Date – 28/07/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. ‘Tourism Awareness Week 2024’ chu nimin khan Tourism Minister Pi Lalrinpuii’n a hawng.
2. Special Court, ND&PS Act rawka Cheng Nuai 24 chuang ru chhuaktu ni ngeia rinhlelh mi pakhat an man thu Aizawl SP, Rahul Alwal-a’n chanchinbumite a hrilh.
3. Prime Minister Narendra Modi-a’n vawiin chawhma dar 11 hian Akashvani kaltlangin mipuite hnena thu a sawina hun, Mann Ki Baat programme a hmang leh dawn
4. Paris Olympic 2024-ah Australia-in Gold Medal la tam berin hma a la hruai.



TOURISM

Tourism Minister Pi Lalrinpuiin nimin khan ‘Tourism Awareness Week 2024’ chu Aizawl Millenium Centre kawtah a hawng.

Pi Lalrinpuii chuan Mizoram chhunga tourism tihmasawn tur chuan a chhunga cheng mipuite an pawimawh, a ti a. Tourism hmasawn theihna tam tak a la awm thu te, tourism chungchanga rilru puthmang leh a dawnsawn danah pawh hmasawn tlan a pawimawh a tih thu te a sawi a. India ram chu kawvela mihring tanna ber a nih avangin ‘tourism’ ngaihtuah hian ram pawn ami kher beisei tur a ni lova, ram chhung mi atang ringawt pawhin tourist thahnem tak Mizoramin a hmu thei a, hmuh pawh a lo hmu tawh thin a ni, a ti.

Tourism Department Secretary Dr. Lalrozama pawhin thu sawiin, khualzinte duat an nih chuan Mizoram nawm zia zau

zawkin an puang darh zel dawn a ni, a ti a. Tourism tihmasawn turin sorkar leh department-in theihtawp an chhuah thu a sawi a. Hetihruah hian ram thenkhatin khualzin tam lutuk vanga harsatna an tawh te hre reng chung a fimkhurin, tlin tawh ang zela hma lak a tul thu a sawi.

Nimin atanga thla thar August ni 3 chhunga Tourism Awareness Week hman chhung hian Tourism Department chuan “Tourism for All” tih thupuih hmangin tourism chungchang inzirtirna te, khaw thlan bik te tan intihsiakna leh talk show hmang tea khualzin mite lo chhawn dan tur inzirtirtein hun an hmang dawn a. Local cable TV hrang hrangah te Talkshow neih a ni ang a. Rural Tourism Workshop buatsaihin Tourism Village Competition te neih a ni bawh ang a. He intihsiaknaah hian khaw thlan bik pariat – Sailam, Biate, Sairang, Sangau, Aibawk, Baktawng, Buangpui leh Ralvawng te an tel dawn a. Heng bakah hian Mizoram pumpuih tourism chungchanga mipuite hriat tur pawimawh inziahna Pamphlet sem a ni ang a, zin kawng khaw kar leh Tourism hmun hrang hrangah Hoarding tar a ni bawh ang.



SPEAKER

Assembly Speaker Pu Lalbiakzama'n Tamdil-a Contour Hedgerow Farming Programme nimin khan a hmanpui a, he hunah hian mi 106-te hnenah tanpuina hlan a ni.

Pu Lalbiakzama chuan Mizoram chu tlang ram a nih avangin leilung a luangral chak a, lei tha a inchhekkhawmleh har avangin khawvel hmun dang, ram rem leh phaizawlte aiin a let tam takin humhalh a hautak zawk, a ti a. Contour Hedgerow Farming hmanga lei tha kal ral lo thei ang bera leilung hman tangaileh chu chu mihring leh nungchate damkhawchhuah nana tih-makmawh a ni tih sawiin mihringte nunna atan chaw thar chhuahna tur leilung mamawh a ni, a ti a.

Leilung kalral tam lo leh hlawk si-a thlai thar dan leh ram leilung pianhmang mil tur Forest Dept ten an hmang tangkai thiam chu fakawm a ti a. Ramngaw leh lei chunglang hang tha te humhalh tur hian Dept. tha chakna ringawt a tawh zo lova, mi zawng zawng an pawimawh a ni, Speaker chuan a ti a. A bik taka huan lo ram neitute pawimawh zia sawiin 'Integrated Management Plan of Tamdil Wetlands' hnuaiia thlan tawh chhungkaw 318 leh la thlan tur, an vaiin chhungkaw 530 te'n a

nihna ang taka an kalpui chuan leilung humhalh leh thlai thà hlawk kawngah Saitual leh a chhehvel nghawng dawt tham a ni dawn, a ti.

Tamdil Wetland Monitoring Committee hnuaiah hian Saitual, Sihfa, Tualbung leh Dilkhan khua te awmin anni hian Balhla leh Lakhuihthei an ching a. Hei bakah hian Tamdil Integrated Management Plan hnuaiah Farm Based & Skill Based Microenterprises atangin chhungkaw 150-in tanpuina an dawng tawh bawk.



LADC

Lai Autonomous District Council (LADC)-a ZPM MDC pahnih te MDC an nihna hlihsak an nih lohna chhan tur sawifiah tura LADC Chairman-in a hriattir chu High Court-in kaldan pangngaia kal turin thutlukna a siam.

LADC-a MDC pakua te chu June 20 khan ZPM party-ah lawm luh an ni a; heng zinga pahnih chu Independent MDC an ni. Heng Independent MDC pahnih - Pu LR Dingliana Chinzah leh Pu N. Zangura te chu LADC Chairman Pu VL Hmuaka'n tun thla ni 12 khan LADC Dan ding lai angin Political Party an zawm vanga MDC an nihna hlihsak an nihlohna chhan tur sawifiah tura hriattirna pein tun thla ni 18 thleng khan insawifiahna hun a pe a, MDC pahnihte hian hun bi tiam chhung hian an chhang a.

Lawngtlai AOC Veng bialtu MDC Pu LR Dingliana Chinzah in Lawngtlaia kan corr. a hrih dan chuan, insawifiah tura hriattirna an hmuh hnuaah High Court-ah an zualkova. Gauhati High Court, Aizawl Bench chuan an zualkona chu ngaihtuah nghalin MDC an nihna hlihsak leh hlihsak loh chungchangah LADC chu hma la lova, an awmdan pangngaia awm turin a ti a ni.

Hemi hma lam hian MNF MDC Pu K. Hre Kung chuan ZPM a lo zawm tawh a. Hemi thu-ah pawh hian Gauhati High Court Aizawl Bench chuan tuna Independent MDC pahnihte chungchanga thu a tih tluk ang tho hian thu a lo titlu tawh bawk a ni.



CHAMPHAI

Hualngo ram People's Organisation hnuai Chin Defence Force, (CDF) miten ruihhlo chi hrang hrang an man te chu nimin khan Zokhawthar bul, Khawmawi-ah halral a ni.

Heng ruihhote halral a nih hmain inkhawm buatsaih a ni a; he inkhawm Pu C. Lianzova kaihhruaiah hian khuallian, Champhai Sub-Hqrs. YMA President Pu F.Lalrinmuana leh khualzahawm Pu C. Lalhnunpuia, Vice president, MJA Champhai distrinct ten thu sawiin ruihhlo thahnem tak mantu CDF-te thawhrimna fakin, Mizorama ruihhlo lut tur te lo danga Mizorama ruihhlo dotute nen thawhhona tha nei zel turin an sawm a ni.

He huna ruihhlo halral takte hi - Methamphetamin mum 55,200, kg.5, Cheng Nuai 65 man; Heroin hawng 291 Cheng Nuai 21 chuang man leh Ganja Kg. chanve, Cheng 2500 man te a ni a; a vaia an halral hlut zawng hi Cheng Nuai 86 Sing 8 Sang 5 a ni.



AIZAWL SP

Aizawl SP, Rahul Alwal-a'n Special Court, ND&PS Act rawk a, pawisa dahna safe atanga Cheng Nuai 24 Sing 8 Sang 7 leh 84 ru chhuaktu ni ngeia rinhlelh mi pakhat an man thu chanchinbumite a hrilh.

Pu Rahul Alwal-a hian Aizawl District Court-a Special Court, ND&PS Act rawk a nih chungchangah Special Court, ND&PS Act Cashier Lalawmpuia hnen atangin thla hmasa June ni 3 khan FIR an dawng tih a sawi a. FIR an bawhzuina atangin Aizawl District Court-a a pa ai kala thawk ve thin Lalrinnggheta, kum 30, Tuikual C, Aizawl chu rinhlelh a nih thu leh man tura theihtawp chhuah a nih hnuah tun thla ni 24 khan Lungleia a thiante inah man a ni a; thu zawhfiah atan Aizawl PS-ah an kawl mek tih a sawi.

Lalrinnggheta hian June ni 1 khan court chhunga a luh thu sawiin, hacksaw blade leh chem hmangin pawisa dahna kawpza chu zai chhiain a kar hawng a; safe chhunga pawisa lo awm chu chhiar lovin a bag-a leng zat a lak chhuah thu Police a hrilh a. A pawisa lak atang hian Cheng Nuai 16 Sing 5 Sang 2 leh 648 chu MRB-a a account-ah a dah lut a, scooter leh thuamhnaw bakah ruihna tur damdawi leiin Aizawl-a hotel hrang hranga a awm kual hnuah Lunglei lamah a zin pheii a ni.

Lalringngheta hnen atang hian a pawisa ruk atanga a lei Aerox scooter Cheng Nuai 2 Sing 5 man leh helmet, Puma sneakers Cheng 5,000 man, Vape Cheng 4,000 man leh thawmhnaw thenkhat bakah pawisa fai Cheng 36,000 man a ni a. A MRB account-a pawisa Cheng Nuai 7 Sing 6 Sang 3 leh 410 chu khawih chet theih loha hrensak a ni bawk.

<><><>

MAMIT

Mamit SP Pi Lalthangpuii Pulamte leh Mamit District MJA chuan an District chhunga Assam ramri pahnih, Thinghlun leh Kolalian Border Outpost-te nimin khan an tlawh.

Border outpost a awm sipaite leh khawtlang hruaitute chuan tha taka lo dawngsawngin report hrang hrang ngaihthlak a ni a, khawtlang leh Kohhran hruaitute nen an inkawmho a. Ramria Police outpost awmnaa khawtlang hruaitute nen hian thawhhona tha tak hnuaiah hma lak thin a nih thu te tarlangin ramri hi ruihhlo leh a kaihnawih hrang hrang luhna khân remchang tak a nih avangin khawtlang leh Police-te nen tanrual a ngaih thu sawiho a ni a. Outpost-a awm Police-te pawh ruihhlo laka fihlim an nih ngei a ngaih thu sawi lan a ni bawk.

Thinghlun Border outpost-ah hian 4th IR Bn awmin, Kolalian-ah hian 3rd Bn. MAP an awm a. Heng border outpost-ah te hian harsatna lian tham sawi tur a awm rih lo a ni.

<><><>

PM MANN KI BAAT

Prime Minister Narendra Modi-a'n vawiin chawhma dar 11 hian Akashvani kaltlangin mipuite hnena thu a sawina hun, Mann Ki Baat programme a hmang leh dawn a. A thu sawi hi Mizo tawnga lehlinin a zui nghal ang. Tun tum hi hun a hman vawi 112-na tur a ni.

Prime Minister Mann Ki Baat hi Akashvani leh Doordarshan, AIR News website leh newsonair mobile app-ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel-ah te live-stream a ni ang.



PARIS OLYMPICS 2024

Infiamna hrang hranga khawvel ram hrang hrangte inelna ropui bera ngaih, Zirtawp zana France khawpui Paris-a tan tak, Paris Olympics 2024-ah Australia chuan Medal la tam berin hma a la hruai rih a, Gold Medal 2 leh Silver Medal 1 a la tawh a. China-in dawtin Gold Medal 2 a la tawh a, a thlengtu ram France chu pathumna ni mekin Gold, Silver leh Bronze Medal 1 theuh a la tawh a. India aiawha Meter 10 atanga Air Pistol inkahsiaka tel Manu Bhaker-i chu Medal dawng thei turin Final a lut a ni.

